

KEPERLUAN KEBAJIKAN TERHADAP ISTERI KEMATIAN SUAMI DALAM TEMPOH IDDAH: SATU TINJAUAN RINGKAS

ZANARIAH DIMON¹, MAFFUZA SALLEH¹, NORITA KAMARUDDIN¹, NAQIBAH
MANSOR²

¹ Pensyarah, Fakulti Syariah dan Undang-undang, Kolej Universiti Islam Antarabangsa Selangor
zanariah@kuis.edu.my

² Pembantu Penyelidik

ABSTRAK

Perkahwinan yang diharapkan berpanjangan sehingga ke akhir hayat adakalanya tidak kesampaian apabila perceraian berlaku atau apabila salah seorang pasangan meninggal dunia. Isteri yang berhadapan dengan kematian suaminya perlu menjalani tempoh iddah selama empat bulan 10 hari. Isteri tersebut juga perlu menjaga batasan dan larangan berihdad sepanjang tempoh tersebut. Kadangkala dalam berhadapan dengan situasi kehilangan orang yang tersayang seperti itu, fizikal dan emosi isteri juga terganggu sehingga mengakibatkan kebajikan mereka terjejas. Mereka juga perlu mematuhi larangan berihdad seperti larangan keluar rumah tanpa urusan mustahak atau bekerja yang adakalanya menyebabkan mereka tidak dapat mengurus keperluan sendiri dan anak-anak dengan baik tanpa bantuan dan perhatian dari orang lain. Justeru, peranan keluarga, rakan-rakan dan majikan sangat diperlukan dalam tempoh tersebut. Oleh itu, kajian ini dijalankan bagi mengenal pasti bentuk kebajikan yang diperlukan oleh isteri kematian suami ketika dalam tempoh iddah. Kaedah pengumpulan data yang digunakan adalah melalui temubual separa struktur terhadap lima orang informan yang terdiri daripada isteri kematian suami. Temu bual ini direkodkan dan kemudian dialihkan dalam bentuk tulisan melalui kaedah transkripsi. Transkripsi itu kemudian dimasukkan ke dalam perisian ATLAS.ti versi 8.4.15 dan dianalisis menggunakan perisian tersebut bagi membentuk tema dapatan daripada informan. Analisis deskriptif dijalankan berdasarkan tema-tema berkaitan kebajikan. Hasil kajian mendapati kebajikan dalam bentuk material dan sokongan moral adalah sangat penting sebagai antara kebajikan yang sangat diperlukan oleh isteri kematian suami dalam tempoh tersebut. Keprihatinan dan pertimbangan majikan juga dikenal pasti sebagai aspek yang diperlukan oleh isteri kematian suami dalam tempoh iddah khususnya yang melibatkan isteri bekerjaya. Justeru, kajian ini diharapkan dapat memberi input kepada pihak-pihak yang berkaitan dalam menyantuni golongan isteri kematian suami dalam tempoh iddah bagi menjamin kesejahteraan dan kebajikan mereka secara berterusan.

Kata kunci: kebajikan, isteri kematian suami, iddah, ihdad

PENGENALAN

Terdapat dua jenis perceraian, iaitu cerai hidup dan cerai mati. Dalam kajian ini, penulis memfokuskan kepada situasi cerai mati. Hal ini kerana, terdapat perbezaan pelaksanaan terhadap hukum iddah antara kedua bentuk perceraian ini (Arsjad & Barakah, 2017). Wanita yang kematian suami wajib melakukan iddah dan ihdad. Tempoh pelaksanaan iddah dan ihdad adalah selama empat bulan sepuluh hari. Namun demikian, tempoh ini bergantung kepada keadaan atau situasi wanita tersebut ketika kematian suami. Islam telah menetapkan perkara-perkara yang haram dilakukan ketika dalam iddah. Islam juga turut menggariskan larangan bagi wanita yang kematian suami ketika berihdad. Walau bagaimanapun, sekiranya terdapat kemudaratan, Islam mengharuskan dan memberi kelonggaran selagi perbuatan atau kelakuan tersebut tidak melanggar syarak.

Tempoh empat bulan sepuluh hari itu merupakan suatu tempoh waktu yang sesuai untuk isteri memulihkan emosi dan memulakan kehidupan yang baharu. Ketika waktu tersebut, isteri boleh mempamerkan rasa sedihnya namun dengan cara yang terbatas dan terkawal (Syh Noorul Madiah & Raihanah, 2010). Hal ini sebagai bentuk ruang yang diberikan kepada isteri untuk memulihkan

emosi mereka setelah kematian suami. Wanita perlu faham bahawa tempoh iddah dan ihdad ini bukanlah bertujuan untuk mengongkong kehidupan mereka. Ia sebagai suatu bentuk perlindungan dan merupakan tanda pengabdian kepada Allah SWT. Allah SWT mewajibkan iddah dan ihdad agar kehormatan wanita dan maruah suaminya terjaga.

Walau bagaimanapun, dalam berhadapan dengan situasi kehilangan orang yang tersayang buat selama-lamanya, fizikal dan emosi isteri juga terganggu sehingga mengakibatkan kebajikan mereka terjejas. Mereka juga perlu mematuhi larangan berihdad seperti larangan keluar rumah tanpa urusan mustahak atau bekerja yang adakalanya menyebabkan mereka tidak dapat mengurus keperluan sendiri dan anak-anak dengan baik tanpa bantuan dan perhatian dari orang lain. Justeru, peranan keluarga, rakan-rakan dan majikan sangat diperlukan dalam tempoh tersebut. Oleh itu, penulisan artikel ini adalah bagi menganalisis bentuk kebajikan yang diperlukan oleh isteri kematian suami ketika berihdad sepanjang tempoh iddah.

METODOLOGI

Bagi menjalankan kajian ini, penulis telah menggunakan pendekatan penyelidikan kualitatif dalam bentuk kajian kes. Kaedah pengumpulan data yang digunakan adalah temubual separa struktur bersama lima orang informan. Instrumen pengumpulan data yang digunakan adalah soalan temubual yang telah mendapat pengesahan pakar. Kajian yang dijalankan ini menggunakan persampelan bertujuan (*purposive sampling*) iaitu lima orang isteri kematian suami telah dipilih sebagai informan kajian. Penyelidik memilih kaedah persampelan bertujuan kerana menurut Kamal Azmi et al. (2015), kaedah persampelan ini sesuai digunakan untuk mendapatkan maklumat yang mendalam dan subjek yang biasanya dipilih berdasarkan tujuan yang ada kaitan dengan kajian. Kriteria inklusif yang telah ditetapkan bagi pemilihan sampel ialah: i) wanita yang kematian suami ii) kematian suami melebihi sembilan bulan, iii) wanita yang bekerja. Kriteria-kriteria ini ditetapkan untuk mendapat gambaran sebenar mengenai kepatuhan dan permasalahan serta kebajikan yang diperlukan semasa menjalani tempoh iddah kematian suami.

Bagi menganalisis data kajian ini, data temu bual ini direkodkan dan kemudian dialihkan dalam bentuk tulisan melalui kaedah transkripsi (Ghazali et al. (2016). Transkripsi itu kemudian dimasukkan ke dalam perisian ATLAS.ti versi 8.4.15 dan dianalisis menggunakan perisian tersebut bagi membentuk tema dapatan daripada informan kajian. Seterusnya, setiap tema yang yang diperolehi dikelaskan kepada beberapa tema utama seperti bentuk kepatuhan, permasalahan yang dihadapi dan bentuk kebajikan yang diperlukan. Setelah itu, data tersebut dihurai dalam bentuk deskriptif untuk memudahkan pemahaman pembaca. Informan yang terlibat dalam temu bual diberikan nama samaran. Tujuan nama samaran ini digunakan untuk memastikan identiti sebenar informan dapat dirahsiakan daripada pengetahuan orang ramai.

DAPATAN

Demografi Informan


Jadual 1 menunjukkan latar belakang demografi lima orang informan yang terlibat dalam kajian ini. Informan yang terlibat berusia antara 32 hingga 47 tahun. Kesemua informan adalah isteri yang telah kematian suami melebihi tempoh 1 tahun hingga 3 tahun. Kesemua informan yang terlibat dalam kajian ini adalah bekerja dan mempunyai anak kecuali informan 4 tidak mempunyai anak.

Jadual 1: Demografi Informan

Informan	Umur	Pekerjaan	Bilangan anak	Tempoh kematian suami	Sebab Kematian Suami
Informan 1 (Puan Ain)	47	Penyampai Radio	5	1 tahun	COVID-19
Informan 2 (Puan Siti)	44	Pekerja Kerajaan	4	1 tahun	COVID-19
Informan 3 (Puan Aminah)	46	Penolong Pendaftar	4	3 tahun	Sakit
Informan 4 (Puan Laila)	32	Guru KAFA	Tiada	3 tahun	Kemalangan motorsikal
Informan 5 (Puan Sakinah)	46	Tukang Urut	4	2 tahun	Sakit

Analisis Tema

Rajah 1 menunjukkan tema-tema yang diperolehi daripada data temubual berkaitan bentuk kebajikan iaitu bantuan yang diberikan semasa tempoh berihdad, kebajikan semasa bekerja, dan cadangan kebajikan yang diperlukan oleh isteri kematian suami semasa tempoh berihdad.



Rajah 1: Bentuk Kebajikan

Bantuan kepada isteri kematian suami semasa tempoh berihdad

Pemberi bantuan

Dapatan kajian menunjukkan pemberi bantuan terdiri daripada ramai pihak. Ada yang menerima bantuan daripada jiran tetangga, keluarga sendiri, keluarga sebelah suami, ahli jawatankuasa masjid, Persatuan Ibu bapa dan Guru (PIBG) sekolah, rakan-rakan, pihak zakat, pihak NGO dan majikan. Dapatan menunjukkan pemberi bantuan juga terdiri dalam kalangan jiran tetangga seperti yang diujarkan oleh Puan Ain “*Jiran saya depan rumah... Dia ada pengalaman... dia pun banyak bagi saya backup bagi saya support moral... Sebab dia dah alami... So dia banyak bantu saya... Banyak bagi info semua dia lah...*” (25810:26001), “*Jiran sangat-sangat membantu... Sebab yelah kita ini... jenis yang kan tak pernah keluar rumah...*” (27889:27985), “*Eh... Memang bersyukur lah dapat jiran-jiran yang baik... Cumanya tak ada lah setiap masa tapi diaorang ada ambil berat... Tanya khabar, bagi makan...*” (28131:28534). Puan Siti “*Ui... Jiran sangat baik... Ma sha Allah... Alhamdulillah... Memang sangat-sangat baik... Depan belakang lorong belakang lorong sana satu taman tu lah... Ya Allah... Memang... Memang rezekilah...*” (28423:28616). Puan Aminah “*Alhamdulillah lah saya dapat jiran yang baik... Dari segi anak-anak pun sometimes kita... kan kita dah jadi kena buat urusan sorang kan... So bab urusan anak-anak pun sometimes dia volunteer, dia tolong jaga kan... Kadang-kadang budak ni main kat bawah pun diaorang tolong tengok kan.. so secure lah dekat rumah...*” (16849:17163).

Selain itu, keluarga sendiri dan keluarga sebelah suami juga antara pemberi bantuan. Puan Aminah “*Dan keluarga akak lah... Banyak support... Keluarga*” (9281:9462). Puan Sakinah “*Adik-beradik*

sebelah suami yang lelaki” (13385:13423), “Adik-beradik suami yang lelaki dan perempuan...” (13480:13528), “Sampai sekarang ni pun apa hubungan antara family saya dengan sebelah arwah memang okey je... Ada je diaorang kadang-kadang hulur gak bantuan tu...” (14010:14157). Seterusnya pemberi bantuan dalam kalangan AJK masjid dan PIBG sekolah. Puan Siti “AJK masjid AJK PIBG sekolah banyaklah... Cikgu-cikgu sekolah budak-budak ni ya Allah... Memang sangat membantu lah...” (30235:30703), Puan Aminah “Daripada sumbangan akak ada dapat daripada masjid... Masjid al-Azhar...? Masjid BSP” (26406:26560), “Kalau AJK... AJK surau ada... Setiap kali perayaan tu kalau ni bulan Ramadhan apa semua... Dia ada lah sebab dia nak bagi duit raya untuk anak-anak yatim kan...” (26682:26841). Puan Laila “Dekat masjid lah... Ada ada... Tapi buat dekat masjid” (23132:23185). Puan Sakinah “Ada AJK masjid” (43609:43623).

Pemberi bantuan juga ada dalam kalangan rakan-rakan. Puan Aminah “Rakan sekerja ada... macam apa ni... kira yang kenal arwah suami kan...” (26406:26560). Puan Laila “Tak ada jugalah... Maksudnya masing-masing kalau yang masa hari pertama tu tak ada... Entahlah... Yang saya ingat hari pertama tu memang saya tak masuk kelas kawan-kawan pun tak adalah cakap apa-apa, sebab mungkin diaorang takut kalau cakap takut tersinggung ke apa ke... Hari kedua tu dah masuk mengajar macam biasalah... Tak adalah diaorang bagi motivasi ke apa ke tak adalah... Cuma diaorang bantu-bantu... Okey... Macam kerja saya mana yang diaorang boleh ambil buat dulu diaorang buat... Tapi kerja-kerja mengajar tu memang tak boleh siapa yang cover lah... Memang kita kena sendirilah buat settlekan...” (29545:30153), “Banyak kalau macam kawan-kawan banyak tolonglah sebab diaorang pun nampak saya pun macam tak tahu nak mula buat apa dulu kan... Kawan-kawan banyak tolonglah” (28190:28417), “Dengan bantuan kawan-kawan lawyer sebab diaorang kata as long as kiraan betul apa semua tak ada masalah lah... So saya dah buat kiraan sendiri lepastu saya minta kawan-kawan yang lawyer check kan...” (34453:34874).

Seterusnya, daripada pihak majikan seperti yang diujarkan oleh Puan Laila “Kalau dari segi... Ada juga duit saguhati sekolah bagi... itu jelah...” (28190:28417). Manakala yang terakhir adalah pemberi bantuan daripada zakat dan pihak NGO. Puan Sakinah “Tak... duduk rumah sewa... Rumah zakat yang bayar” (16529:16576), “Rumah tu 650 memang zakat yang bayarkan... Kitaorang cuma bayar air api... Lepastu belanja bulanan memang saya dapat daripada tak ingat... Daripada anak yang nombor 4 start dapat..” (18065:18244), “Ha ah yang zakat beri bantuan tu memang sentiasa dapat... Lepastu macam memang tak risau bab makanan ke apa ke ada je orang bagi macam tu dan kita tempoh iddah tu kan tak boleh nak kerja sangat kan, selalu hantar lah” (19254:19469), “Tu kadang NGO tu datang pun sebab saya ramai NGO yang datang dekat rumah waktu yang ni kan...” (12304:12398).

Bentuk bantuan

Bentuk bantuan yang diperlukan berbeza mengikut situasi dan keadaan informan. Ada informan yang lebih memerlukan sokongan moral, dan ada informan yang memerlukan bantuan kewangan. Puan Ain “Sokongan moral la penting...” (34904:34933), “Bukan saya kata saya ada duit... Tak... Tapi saya fikir sebab saya ada... Duit tu orang kata boleh cari... Dan kita tak perlu minta... kadang-kadang ada orang yang nak bantu kita dia tak ada duit so kita tak perlukan yang itu... Pada saya... saya perlukan sokongan emosi... Sokongan datang rumah, tanya khabar... At least telefon kan... Sebab kadang-kadang benda tu yang... Saya ni... Saya suka bercakap... Jadi kalau saya tak bercakap satu hari saya risau...” (34989:35448). Puan Siti “Moral support je” (30824:30840). Puan Aminah “Masa tu dari segi kewangan... Makanan semua tu... Macam bukan

satu keperluan utamalah... akak boleh survive lagi lah masa tu...” (27339:27467). Puan Sakinah “Waktu tu... Kewangan je la kot... sebab kita nak beli barang basah kan... Barang-barang asas tu memang ada je orang hantar... Kadang-kadang tak habis pun... Saya bila tak habis kang macam membazir pula kan saya hantar ke rumah sesiapa yang memerlukan... Macam tu” (42685:42947).

Selain itu, bentuk bantuan yang diberikan kepada informan ketika dalam tempoh iddah adalah dalam bentuk makanan dan barang-barang basah. Puan Ain *“Peramah sangat... Satu taman tu... dia bukan satu lorong, satu taman dia jaga... Macam yang lain-lain tu... Kalau ada masalah dia akan datang... Tanyalah tanya... Tapi macam bagi macam juadah dekat anak-anak... Diaorang akan bagi lah... Alhamdulillah... Eh... Memang bersyukur lah dapat jiran-jiran yang baik... Cumanya tak ada lah setiap masa tapi diaorang ada ambil berat... Tanya khabar, bagi makan...” (28131:28534). Puan Laila “Ada diaorang bantu masa seminggu kematian arwah suami saya tu, diaorang hantar makanan semualah untuk family” (19389:19497). Puan Siti “AJK masjid AJK PIBG sekolah banyaklah... Cikgu-cikgu sekolah budak-budak ni ya Allah... Memang sangat membantu lah... Kadang-kadang dia nak hantar bantuan macam barang makanan basah-basah kita kata tak apa tak apa bagi lah orang lain yang lebih perlu... Bukannya kita sombong... Tapi kita rasa kita rasa ramai lagi orang lain yang susah... Kita ni boleh lagi beli tak ada masalah... Hantar juga... Tak apa ini sumbangan dah Puan... Okey okey saya terima... Macam tu lah” (30235:30703), “Dia hantar makanan banyak-banyak apa semua, hantar ikan hantar ayam lah... Segala bagai lah... Stok dia kata untuk masak apa semua...” (9420:9552).*

Ada juga bentuk bantuan yang dilakukan seperti pelaksanaan kenduri tahlil Puan Ain *“Bayangkan masa meninggal tu, malam tu... Jiran-jiran saya buat bacaan yasin tahlil ramai... Keluarga belah suami tak ada... Tapi belah saya buat lah... alhamdulillah... Sebab saya paksa saya kata saya nak buat juga... So memang panggillah ramai... Jiran saya buat tanpa disuruh pun... Tiga hari berturut-turut... Hebatlah jiran-jiran... Saya rasa macam ya Allah... Itulah rezeki...” (28931:29311), Puan Laila “Dekat masjid lah... Ada ada... Tapi buat dekat masjid” (23132:23185).*

Selain itu, mereka juga diberi bantuan seperti jiran memantau keadaan anak-anak. Puan Aminah *“Alhamdulillah lah saya dapat jiran yang baik... Dari segi anak-anak pun sometimes kita... kan kita dah jadi kena buat urusan sorang kan... So bab urusan anak-anak pun sometimes dia volunteer, dia tolong jaga kan... Kadang-kadang budak ni main kat bawah pun diaorang tolong tengok kan.. so secure lah dekat rumah...” (16849:17163) dan juga bantuan daripada rakan sekerja Puan Laila “Cuma diaorang bantu-bantu... Okey... Macam kerja saya mana yang diaorang boleh ambil buat dulu diaorang buat... Tapi kerja-kerja mengajar tu memang tak boleh siapa yang cover lah... Memang kita kena sendirilah buat settlekan...” (29545:30153), “Banyak kalau macam kawan-kawan banyak tolonglah sebab diaorang pun nampak saya pun macam tak tahu nak mula buat apa dulu kan... Kawan-kawan banyak tolonglah...” (28190:28417).*

Ada juga informan yang mendapat bantuan daripada guaman untuk menyemak pembahagian faraid yang dilakukan. Puan Laila *“Oh tak ada... Saya buat sendiri... Dengan bantuan kawan-kawan lawyer sebab diaorang kata as long as kiraan betul apa semua tak ada masalah lah... So saya dah buat kiraan sendiri lepastu saya minta kawan-kawan yang lawyer check kan... Betul ke kot ada yang saya salah ke apa ke... diaorang kata okey, kiraan betul apa semua so saya memang berpandukan kiraan tu dan bahagikan harta ikut kiraan yang dah ditentukan tu lah...” (34453:34874).*

Akhir sekali bentuk bantuan yang diterima adalah bentuk sumbangan kewangan Puan Aminah “Rakan sekerja ada... macam apa ni... kira yang kenal arwah suami kan... Daripada sumbangan akak ada dapat daripada masjid... Masjid al-Azhar...? Masjid BSP” (26406:26560), “Kalau AJK... AJK surau ada... Setiap kali perayaan tu kalau ni bulan Ramadhan apa semua... Dia ada lah sebab dia nak bagi duit raya untuk anak-anak yatim kan...” (26682:26841). Puan Laila “Kalau dari segi... Ada juga duit saguhati sekolah bagi... itu jelah...” (28190:28417), “Ada sumbangan...” (28894:28910). Puan Sakinah “Tak... duduk rumah sewa... Rumah zakat yang bayar” (16529:16576), “Rumah tu 650 memang zakat yang bayarkan... Kitaorang cuma bayar air api... Lepastu belanja bulanan memang saya dapat daripada tak ingat... Daripada anak yang nombor 4 start dapat..” (18065:18244), “Dapat bantuan zakat tu 12 tahun lepastu bulanan dapat 500...” (18716:18783), “Adik-beradik suami yang lelaki dan perempuan...” (13480:13528), “Diaorang bagi duit selalunya... masuk akaun” (14629:14672).

Kebajikan semasa bekerja

Keadaan bekerja

Informan mendapat pelepasan kerja pada waktu malam dan kerja luar. Puan Ain “Saya konti... Saya konti malam... Alhamdulillah sepanjang konti tu saya diberi pelepasan untuk 4 bulan... tempoh 4 bulan tu... saya tak duduk konti lah... Yang tu lah nampak... itu big boss saya kata tak payah... so saya tak buatlah..” (33845:34076). Puan Siti “Dalam tempoh iddah? Tak ada... Tak ada... Sebab minta dekat bos tunggu habis iddah boleh tak hantar saya outstation macam tu... Tapi pergi kerja lah... Tetap pergi office lah...” (29530:29707). Puan Laila “Cuma masa tu memang saya ada program kena settlekan dekat Tanjung Karang tapi saya pas pada guru yang lain lah sebab saya tak boleh keluar macam tu kan, macam kerja setakat saya pergi sekolah je... Jauh-jauh saya tak” (19752:19991).

Waktu bekerja mereka juga tetap sama seperti bekerja di luar tempoh iddah. Puan Siti “Biasanya keluar rumah pukul 7... Kalau sampai pukul 8, pukul 5 lah balik... Macam tu... Asalkan cukup 9 jam kan... Tapi paling lewat pukul 9 lah... Kalau pukul 9 sampai, pukul 6 balik... Macam tu...” (31375:31573). Puan Laila “Masuk pukul 12, pergi pukul 12, balik pukul 6... 6:30 sampai rumah macam tu...” (24877:25434).

Namun demikian, layanan majikan terhadap mereka masih sama walaupun mereka adalah ibu tunggal yang perlu menguruskan hal anak-anak sendirian. Puan Ain “Kalau kerja kan... Kalau kerja saya tengok sekarang ni... Kalau majikan... Dia macam tak kisah pun saya ni ibu tunggal ke tak...” (27239:27376), “Ha ah sama je... Kau kerja kau tetap kena jalankan kerja kau... Walaupun kau ibu tunggal... Macam tu lah... Maksudnya... Sebab kadang-kadang kita bagi alasan anak saya tak ada siapa jaga... Dia ada memo juga tapi kalau hal yang melibatkan yang ni... kau kalau nak buat kerja... Kau tak boleh ada alasan... Macam tu... Susah juga la sebenarnya tapi saya follow the flow je... Saya buat je...” (27421:27810).

Ada juga majikan yang tidak memahami keadaan informan. Puan Siti “Majikan ni kan... Dia nampak macam faham... Tapi kan macam bila kita ada buat silap... Sebab kita dalam fikiran yang bercelaru kan... Lepastu long covid lagi... Long covid ni buat kita banyak lupa benda... Kita rasa kita cakap A, tapi sebenarnya kita cakap B... Kita tak perasan... Melainkan orang tu yang bagitahu

kita... So setiap kali meeting ke apa akak akan cakap dulu... Saya minta maaf saya ada long covid... Kalau ada benda yang saya cakap mungkin tak rasional... Tolong tegurlah... Terpaksa cakap macam tu... Lepastu tulah... Bila jadi macam tu... Walaupun kita dah cakap bagitahu awal-awal dia sebenarnya macam... Dia kata okey dekat depan kita... Yelah kita faham dia faham apa semua tapi bila jadi macam tu lepastu nanti dia cakap dengan kawan kita yang lain... Dalam meeting yang lain... Ha jangan jadi macam tu...” (25182:26016). Hal ini membuatkan Puan Siti berasa tidak semangat sehingga membuatkan beliau berniat untuk berhenti kerja. Puan Siti “...dia cakap depan orang yang ramai yang lain... Dalam meeting yang lain... Tu masa tu... Akak memang frust gila... Down balik... Down balik masa tu... Rasa macam nak berhenti kerja... Ataupun nak minta tukar... Ni bos nombor dua lah...” (26125:26916).

Kajian mendapati terdapat informan yang masih bersemangat untuk bekerja dalam tempoh ihdad dan ada juga sebaliknya. Puan Aminah “*Saya dekat office memang okey kak... Dekat office saya okey... Apa-apa memang okey... Saya bila balik rumah... Balik rumah automatically benda tu mula lah teringat tu teringat ni apa semua... Dekat office saya lupa... lupa everything... Saya boleh fokus buat kerja... Saya tak teringat family”* (24403:24694), “*Tu akak cakap tadi... Akak kalau untuk ke office akak tak ada masalah... Memang akak semangat... Pergi kerja... memang akak buat kerja.. Cuma bila kata kita nak balik rumah tu dah mula fikir dah... Nak balik rumah macam-macam fikir dah apa dalam rumah tu”* (36150:36404). Puan Laila “*Tak ada jugalah... Maksudnya masing-masing kalau yang masa hari pertama tu tak ada... Entahlah... Yang saya ingat hari pertama tu memang saya tak masuk kelas kawan-kawan pun tak adalah cakap apa-apa, sebab mungkin diaorang takut kalau cakap takut tersinggung ke apa ke...”* (29545:30153), “*Saya sebenarnya apply cuti juga daripada Guru Besar minta cuti ihsan, saya cakap... tak kuat lagi nak drive masa tu tapi Guru Besar cakap call JAIS tanya macam mana, tanya JAIS memang tak bagi... Dia kata memang tak boleh nak cuti cuti macam tu... Dia kata cukup tiga hari kematian, mungkin diaorang cukuplah kot tiga hari cuti kematian tu tapi memang hari keempat tu memang masuk kerja macam biasalah...”* (24877:25434).

Tempoh cuti yang diberikan

Majoriti informan mendapat cuti ehsan kematian suami adalah hanya tiga hari sahaja. SEbagai contoh, menurut Puan Ain “*Betul, 3 hari je.*” (36203:36219), Puan Siti “*Masa tu 3 hari je...”* (5596:5616). Puan Aminah “*Kalau ikutkan kita punya... KUIS punya polisi pun cuma tiga hari je...”* (17282:17352). Puan Laila “*Maksudnya kalau macam cuti yang saya dapat cuti kematian, sebab suami saya meninggal, tiga hari je lah...”* (7188:7294).

Namun demikian, berbeza keadaan Puan Ain dan Puan Siti yang mendapat cuti panjang atas sebab perlu kuarantin. Puan Ain “*2 weeks sahaja yang duduk rumah... Memang duduk rumah fully... Tak pergi mana mana... Yang penting sebulan tu... Eh sebulan pula... seminggu tu... Seminggu lah... yang kuarantin... saya dapat cuti tu memang saya duduk rumah tak pergi mana-mana tak ada keluar langsung...”* (37963:38233) dan Puan Siti yang dijangkiti COVID-19 “*Government 3 hari je untuk kematian kan... Tapi masa tu sebab akak ada macam long covid so impact dia tu kuat juga lah... Kesan dia macam kita tak boleh nak fokus apa semua lagipun memang agak depression sikit masa tu so banyak juga lah ambil cuti... Macam tu...”* (5661:5922), “*KKM bagi 30 hari masa tu...”* (5979:6007), “*Dia betul-betul nak make sure kita punya paru-paru semua okey... sebab bila test tu memang ada rasa macam sesak nafas kan macam tu, so dia pun faham kita ada impact yang pasal kematian apa semua tu... so dapatlah cuti yang tu tapi kena refer psychiatrist, kena*

jumpalah... So bila jumpa psychiatrist tu yang dia bagi dapat 2 minggu 2 minggu tu kan... Dapat 30 hari tu lah...” (6065:6439).

Selain itu Puan Aminah menyatakan ada mengambil cuti tahunan selama dua hari “*Ha... Yang tiga hari dapat tu jelah... Saya memang tambah berapa hari... Dua hari kot...” (17503:17590).* Ada juga dalam kalangan informan yang langsung tidak mendapat cuti tahunan mahupun cuti ihsan. Puan Laila “*Tak ada... Memang tak bagi...” (7370:7400), “Arahan daripada JAIS dan Guru Besar lah sebab maksudnya lepas tiga hari tu saya sebenarnya apply cuti juga daripada Guru Besar minta cuti ihsan, saya cakap... tak kuat lagi nak drive masa tu tapi Guru Besar cakap call JAIS tanya macam mana, tanya JAIS memang tak bagi... Dia kata memang tak boleh nak cuti cuti macam tu... Dia kata cukup tiga hari kematian, mungkin diaorang cukuplah kot tiga hari cuti kematian tu tapi memang hari keempat tu memang masuk kerja macam biasalah... Masuk pukul 12, pergi pukul 12, balik pukul 6... 6:30 sampai rumah macam tu...” (24877:25434).*

Majoriti informan menyatakan tempoh cuti yang diberikan selama tiga hari itu tidak mencukupi. Hal ini demikian kerana, tempoh tiga hari itu tidak mampu untuk memulihkan emosi isteri yang kematian suami. Malah, banyak urusan yang perlu dilakukan oleh isteri seperti membuat laporan kematian dan sebagainya. Puan Ain “*Memang tak cukup, sangat tak cukup... Untuk ibu yang bekerjaya macam saya memang sangat tak cukup... Sebab satu macam situasi saya... Saya langsung tak ada family saya tak ada... Lepastu satu lagi dengan keadaan... Aaa kebetulan pula saya kuarantin... Jadi tempoh tu panjang... Itu rezeki saya lah... Tapi orang yang kematian suami kata lah yang meninggal tiba-tiba bukan sebab covid tiga hari je dia dapat... So masa tu dia banyak tak kan pulih punya... Even sebulan pun... Empat bulan pun tak akan pulih emosi tu... Tapi at least kalau macam seminggu tu... Mungkin kita akan rasa kita dah boleh biasakan diri sikit-sikitlah... Tapi 3 hari tu memang saya rasa sangat tak berbaloi...” (36295:36978). Puan Siti “*Tak... Langsung tak cukup...” (31802:31830), “So yang tu kalau betul memang perlu lebih banyak... Mungkin tak perlulah sampai habis iddah tu... Tapi memadai sebenarnya dia nak develop balik dia punya semangat tu... Atas kehilangan tu... Perlulah... Memang perlu ditambahlah cuti tu...” (35178:35550).* Puan Aminah “*Saya peringkat awal... Tak... Sebab kita kalut kan... Nak pergi... Macam saya kan nak pergi JPN balik nak daftar kematian apa semua... Macam rush lah.... Memang rush..” (29135:29304).**

Ada dalam kalangan informan yang mencadangkan tempoh cuti kematian ditambah paling kurang 14 hari dan ada juga yang mencadangkan minimum sebulan untuk memulihkan kembali emosi dan menyelesaikan urusan harta peninggalan. Puan Aminah “*Akak rasa bergantung kot... Bergantung pada individu tu juga... Sebab dia melibatkan emosi juga kan... Tapi kalau nak buat penetapan... Rasanya mungkin tak tahu lah... Kalau boleh lebih daripada 7 hari ke 14 hari ke... Mungkin” (28815:29040), “At least 14 days tu kira selesa sikitlah...” (29369:29412).* Puan Laila “*Kalau ikut untuk tenangkan diri... Betul... Sebulan dua macam tu lah... Mungkin... Paling-paling minimum sebulan gitulah sebab... Yelah macam saya memang ke sekolah kita drive apa semua even sampai sekarang pun saya trauma tengok motor sampai sekarang pun saya tak boleh tengok macam tu lah benda-benda macam tu kan... sebab arwah suami saya meninggal sebab dia kerja naik motor... Jadi benda tu bagi impact lah... Dalam masa sebulan macam tu lah... Tapi tu lah kita tahu tempat kerja memang tak kan boleh bagi lah sebulan cuti cuma kalau boleh cuti itu dikira tanpa gaji pun macam kalau tanya saya tak bolehlah sebab gaji kecik... dan kita memerlukan banyak kos lah untuk settlekan itu ini...” (37300:37992).*

Cadangan kebajikan

Cadangan kebajikan yang diujarkan oleh informan ialah bentuk bantuan yang diberikan bukanlah hanya dari aspek kewangan, malah mereka memerlukan bantuan dari aspek sokongan moral dan kerjasama ahli keluarga. Puan Siti “*Satu memang moral support tu penting lah... tapi at the same time bantuan-bantuan tu kan kalau untuk family isteri yang tak bekerja tu sebenarnya memang bantuan kewangan tu sedikit sebanyak...*” (34285:34870). Puan Aminah “*And then kerjasama... Kerjasama keluargalah...*” (48988:49191).

Antara bentuk cadangan lain yang diberikan ialah mewujudkan sumber maklumat berkaitan ihdad dengan cara penyampaian yang sesuai dan mudah difahami oleh golongan awam. Puan Ain “*Saya cadangkan satu daripada segi informasi... Informasi yang bukan macam mufti mufti cakap tau... Informasi yang mendekatkan kita dengan mangsa atau informan tu sendiri... Sebab kalau macam penerangan contoh macam mufti hadis ni ni ni menyatakan Rasulullah... Kadang-kadang kita ni tak faham apa penyampaian tu macam dia kata kita tak boleh mengiringi jenazah ke kubur... Kita faham yang tu, tak pergi... Tapi adakah tempoh 4 bulan tu kita pun tak boleh pergi juga... tak ada dalam penerangan tu... langsung tak ada... so saya tak tahu... Perlu ke... Boleh ke tak boleh... Tak jelas... Info yang tu sangat penting...*” (46234:46852), “*Okey dia kata pemakaian, kena pakai gelap-gelap, okey gelap tu macam mana... Bagi details... Kadang-kadang memang tak ramai yang melalui benda ni... Tak ramai dan mungkin tak ramai yang tahu... Tapi bila once dah kena pada diri sendiri... Kita perlu juga cari info tu... Tapi tak ada benda tu... Dan saya yakin sekarang ni ramai... Umat kita umat Islam... Dah ramai dah... Yang muda-muda dan ramai juga sebenarnya untuk pengetahuan isteri-isteri malu ... Muda-muda... Diaorang tak tahu..*” (46869:47356). Puan Sakinah “*Kalau saya mungkin macam ni memang ada terfikir macam tu sebab saya fikir macam oh benda ni tak didedahkan memanglah tak tahu kan... Lepastu saya fikir macam ni... Kenapa tak tubuhkan macam satu group walaupun tak besar tapi buat dekat macam surau ke dekat masjid ke panggil kaum-kaum ibu tu yang kata dedahkan pasal benda ni sebab sebelum ni pun rasanya ramai lagi yang tak tahu...*” (49898:50280), “*Ha ah ya... Buat ceramah pun boleh je kan selit-selit bab iddah ni sebab memang rasanya memang ramailah yang tak tahu kalau tanya pun mesti orang cakap ha tak tahu macam tu kan... Sebab pengalaman saya macam tu lah saya pun tahu perkataan iddah tu saya pun belajar juga dekat sekolah kan... Tapi yelah bila tak didedahkan kita mudah lupa kan...*” (50335:50678), “*Sebab kalau ceramah kita boleh jumpa orang lepastu orang boleh tanya kita direct...*” (52678:52761).

Selain itu cadangan kebajikan yang diutarakan ialah majikan seharusnya memberi ruang kepada pekerja yang kehilangan suami untuk memulihkan tekanan emosi dan fizikal yang dialami. Puan Siti “*Lepastu majikan... Nak kata tu lah... Nak suruh faham kan... Benda ni..*” (35557:35628), “*Bukan semua faham... In fact okey macam ni akak cerita eh... Cuti... Tapi still bagi kerja... Kan... Suruh attend meeting macam tu lah... Attend meeting online... Online je dia cakap... You boleh buat dekat rumah... Betullah.... Tapi tujuan kita cuti tu... Kita nak freekan mind kita kan... Kita nak betul-betul... relax... Bila kita dah kerja... Dah fikir macam-macam yang kita tak fully recover lagi macam mana...*” (35681:36096).

Cadangan kebajikan lain ialah menanamkan kesedaran berkaitan tentang kematian suami seperti pengurusan jenazah, pembahagian harta pusaka, tuntutan Amanah Raya dan sebagainya. Puan Siti

“Sebab dia... Kita faham benda ni macam mana nak buat ni... Macam mana nak buat ni... siapa nak uruskan ni... macam mana nanti anak-anak... Duit tu semua macam mana... lepastu... kita pun tahu kisah masyarakat tu banyak bila bab-bab harta tu kan... Knowledge la sebenarnya benda tu... Macam orang tak faham yang isu... Dia macam macam mana nak cakap eh... Memang banyak yang tak ni lagi lah...” (34285:34870). Puan Aminah “Mungkin kena... Macam Ustazah kata tadi... memang kena buat awareness juga lah... Kena maklumkan juga... Sebab mungkin benda tu tak kena dekat kita lagi kan... Bagi kita mungkin ada yang ambil mudah lah... Mungkin rasa perkahwinan baru lagi takkan nak mengalami kan... Sebab benda ni kita tak jangka” (39852:40151), “Tapi kalau dari segi perbuatan, yang tadi itu jelah... Rasanya... Kita dalam keadaan sekarang ni si isteri tu at least ataupun suami tu at least kena tahu juga... Yang mungkin simpanan-simpanan tu kan... Untuk nak menguruskan jelah...” (48270:48504), “...Pusaka... Tu jelah... Untuk ke arah pusaka tu... Sebab saya rasa...” (48556:48626), “Sebab saya rasa... Mana-mana pun pusaka memang problem kan walaupun mak ayah kita yang meninggal kan...” (48678:48781). Puan Laila “Kena spread awareness untuk wanita-wanita ni tahu tentang pengurusan kewangan dari segi Islam... Apa hak dia... Nanti kalau tak makin banyak lah kes macam arwah Abam isteri kena gula-gula kan... Kena halau daripada rumah... Sedangkan diaorang ada hak diaorang dekat situ tapi diaorang tak tahu... Dan sebab orang Melayu ni kita banyak terikat dengan adat macam kalau suami meninggal rumah ni mentua punya isteri anak tak ada hak... kalau orang tak tahu dia macam susah...” (33457:33927).

Seterusnya cadangan kebajikan lain ialah golongan wanita perlu belajar berdikari di samping mempunyai pendapatan sampingan walaupun hanya seorang suri rumah tangga. Puan Laila “Kalau cadangan saya sebenarnya wanita-wanita dia kena belajar juga untuk berdikari satu dari segi urus kewangan apa semua” (31951:32107), “Saya lebih menggalakkan untuk wanita-wanita isteri-isteri ni untuk ada pendapatan sampingan walaupun dia suri rumah sebab kos untuk uruskan kematian dan urusan selepas kematian tu memerlukan kos yang sangat besar selain daripada kos emosi lah... Kos kewangan tu... Kewangan tu kena ada... Sebab banyak sangat urusan nak kena settlekan semua” (32282:32769).

Selain itu, golongan wanita juga perlu belajar mempertahankan hak mereka agar tidak teraniaya dan ditindas. Puan Laila “Satu lagi perempuan jangan cepat macam tak apalah ni lah keadaan yang berlaku kepada aku... Tak... Dia kena tahu hak dia dan dia kena fight lah... Bukanlah saya menyeru perempuan bergaduh ke apa... Tak... Cuma perempuan dia kena... Tahu hak dia supaya orang tak gula-gula kan... Itu jelah” (33928:34217).

PERBINCANGAN

Hukum syarak menetapkan bahawa isteri yang berhadapan dengan kematian suaminya perlu menjalani tempoh iddah selama empat bulan 10 hari (Syh Noorul Madihah & Raihanah, 2010). Sepanjang tempoh tersebut, isteri perlu berihdad iaitu menjaga batasan dan tidak melakukan perkara-perkara yang dilarang sepanjang tempoh iddah. Antara larangan-larangan tersebut adalah tidak keluar rumah kecuali urusan perlu dan bekerja, tidak memakai pakaian berwarna warni, dilarang berhias atau memakai wangian, haram menerima pinangan dan tidak menunaikan haji dan umrah (Al-Zuhaily, 1989). Sehubungan itu, isteri yang sedang dalam tempoh iddah dan berihdad

sangat-sangat memerlukan bantuan daripada pihak-pihak lain bagi memastikan kebajikan isteri dan anak-anak ini terpelihara selepas kematian suami atau ayah mereka. Lebih-lebih lagi dalam keadaan emosi dan fizikal mereka juga terganggu selepas kehilangan orang yang tersayang buat selama-lamanya.

Secara keseluruhannya, hasil kajian mendapati bahawa sepanjang tempoh berihdad, isteri kematian suami banyak menerima bantuan sama ada dalam bentuk material mahupun sokongan moral. Bantuan yang diberikan adalah daripada pelbagai pihak iaitu jiran tetangga, keluarga sendiri, keluarga sebelah suami, ahli jawatankuasa masjid, Persatuan Ibu bapa dan Guru (PIBG) sekolah anak-anak, rakan-rakan, pihak zakat, pihak NGO dan majikan sendiri serta majikan suami. Bentuk bantuan yang diberikan pula adalah meliputi bantuan barangan makanan dan keperluan dapur, sumbangan duit serta urusan berkaitan majlis tahlil selepas kematian.

Selain itu, kehilangan orang yang tersayang boleh menyebabkan emosi dan psikologi isteri dalam keadaan kurang stabil. Oleh itu, bantuan dari segi sokongan moral sangat diperlukan oleh mereka sepanjang menempuhi tempoh berihdad. Kajian mendapati bahawa selain bantuan material, isteri yang kematian suami ini juga turut menerima bantuan dari segi sokongan moral yang diberikan oleh ahli keluarga dan rakan-rakan dari segi kata-kata semangat, memantau kebajikan anak-anak serta membantu menguruskan pengurusan faraid. Dengan adanya penetapan syarak pembahagian harta kepada golongan ini, sedikit sebanyak membantu isteri ini untuk memulakan kehidupan baharunya (Syh Noorul Madihah & Raihanah, 2010).

Keprihatinan dan pertimbangan majikan juga dikenal pasti sebagai aspek yang diperlukan oleh isteri kematian suami dalam tempoh iddah khususnya yang melibatkan isteri bekerjaya. Berhubung aspek ini, kajian merumuskan bahawa isteri yang kematian suami hanya mendapat cuti ihsan selama tempoh tiga hari sahaja. Mereka tidak boleh mengambil cuti tambahan tanpa rekod sebaliknya jika perlu bercuti lebih daripada tempoh tersebut, mereka perlu mengambil cuti tahunan. Hasil kajian mendapati bahawa tempoh cuti tiga hari itu sebenarnya tidak memadai bagi mereka untuk menguruskan keperluan diri, anak-anak dan perkara-perkara berbangkit daripada kematian suami seperti urusan harta pusaka, insurans dan sebagainya. Keperluan cuti yang mencukupi buat mereka adalah sangat penting bagi memulihkan emosi dan memberi ruang masa yang bersesuaian bagi menguruskan kehidupan bersendirian selepas kematian suami.

Walau bagaimanapun, disebabkan tidak mendapat cuti yang mencukupi untuk memulihkan emosi akibat kehilangan orang yang tersayang, kajian mendapati keadaan ini mempengaruhi semangat mereka untuk bekerja. Ada isteri kematian suami yang didapati tidak bersemangat untuk bekerja, menjadi lebih sensitif dan sentiasa bersedih semasa bekerja sehingga berhasrat untuk berhenti kerja. Oleh sebab itu, menurut Kerajaan Negeri Selangor, secara dasar, semua pekerja atau kakitangan awam diberikan kemudahan cuti selama tiga hari secara automatik sekiranya mereka mengalami situasi kematian ahli keluarga. Namun, bagi wanita yang kematian suami mereka diberikan cuti bergaji selama sebulan. Hal ini secara tidak langsung sebagai inisiatif untuk meringankan beban dan memberi peluang kepada golongan ini untuk membuat persediaan mental dan fizikal apabila kembali semula bekerja (Dewan Negeri Selangor, 2013).

Situasi ini bertepatan dengan kenyataan yang dibuat oleh Datuk Dr Mohd Khairuddin Aman Razali (PAS-Kuala Nerus) ketika perbahasan Titah Diraja di Dewan Rakyat pada 1 Mac 2022, beliau mengesyorkan pemberian cuti khas selama sebulan kepada wanita yang kematian suami itu adalah

wajar. Hal ini kerana, golongan wanita yang kematian suami memerlukan masa untuk menguruskan pelbagai hal rumahtangga seperti urusan anak-anak dan harta pusaka. Selain itu, golongan ini juga memerlukan masa untuk bertenang dalam menghadapi musibah seperti ini. Beliau turut berharap cadangan yang dibawa ini mendapat perhatian pihak kerajaan dan Ahli Parlimen agar dapat sedikit sebanyak membantu golongan tersebut (Agenda Daily, 2022).

Selain itu, kajian juga merumuskan waktu bekerja bagi isteri yang kematian suami adalah sama seperti pekerja-pekerja yang lain. Mereka perlu bekerja mengikut waktu yang telah ditetapkan seperti di luar waktu iddah. Walau bagaimanapun, terdapat majikan yang memberi pelepasan kepada mereka daripada menghadiri program di luar waktu pejabat atau urusan kerja di luar daerah sepanjang tempoh berihdad. Ini menunjukkan majikan memahami keperluan dan menjaga kebajikan mereka dalam tempoh getir tersebut. Selaras dengan itu, Kerajaan Malaysia juga telah mengumumkan wanita yang kematian suami dibenarkan bekerja dari rumah dalam tempoh bersesuaian. Menurut Perdana Menteri Datuk Seri Ismail Sabri Yaakob dalam pelancaran Sambutan Hari Wanita 2022 Peringkat Kebangsaan di Pusat Konvensyen Kuala Lumpur, beliau berkata majikan wajib membenarkan isteri kematian suami bekerja dari rumah. Beliau turut menyatakan keprihatinan kerajaan dalam memahami kesedihan dan bebanan yang ditanggung oleh golongan wanita yang kematian suami ini. Oleh itu, ketua jabatan dan pengurusan tertinggi semua organisasi diwajibkan untuk membenarkan golongan ini bekerja dari rumah. Hal ini untuk memudahkan urusan keluarga dan urusan harta peninggalan suami (Bernama, 2022).

PENUTUP

Kajian merumuskan bahawa kebajikan dalam bentuk material dan sokongan moral adalah sangat penting sebagai antara kebajikan yang diperlukan oleh isteri kematian suami dalam tempoh iddah dan ketika menjalani fasa berihdad. Ini kerana kedua-dua bentuk bantuan tersebut iaitu material dan sokongan moral dapat meringankan kesedihan dan bebanan yang ditanggung oleh mereka. Bantuan dari segi material yang diterima daripada pelbagai pihak juga dapat meringankan beban kewangan mereka dan memberi ruang untuk mereka menyesuaikan urusan kewangan keluarga selepas kematian ketua keluarga dan pencari nafkah utama. Larangan semasa berihdad seperti tidak boleh keluar rumah kecuali urusan perlu dan bekerja telah memberi batasan kepada mereka untuk menguruskan keperluan yang lain seperti pengurusan harta pusaka dan sebagainya. Justeru, keprihatinan dan pertimbangan majikan dan pihak-pihak berkepentingan yang lain juga juga dikenal pasti sebagai aspek yang diperlukan oleh isteri kematian suami dalam tempoh iddah khususnya yang melibatkan isteri bekerjaya. Justeru, kajian ini diharapkan dapat memberi input kepada pihak-pihak yang berkaitan dalam menyantuni golongan isteri kematian suami dalam tempoh iddah bagi menjamin kesejahteraan dan kebajikan mereka secara berterusan.

RUJUKAN

- Agenda Daily (2022, Mac 01). Berita ringkas Dewan Rakyat 1 Mac 2022. <https://www.agendadaily.com/isu-semasa/berita-ringkas-dewan-rakyat-1-mac-2022/>
- Arsjad, R., & Barakah, A. (2017). Iddah Wafat, Antara Agama Dan Budaya. *Jurnal Lentera: Kajian Keagamaan, Keilmuan Dan Teknologi*, 3(1), 123–124. Retrieved from

<http://moraref.or.id/record/view/46678%0Ahttp://ejournal.staimnglawak.ac.id/index.php/lentera>

- Bernamea (2022, Mac 09). Majikan wajib benarkan isteri kematian suami kerja dari rumah – Ismail Sabri. <https://www.bernama.com/bm/am/news.php?id=2059801>
- Dewan Negeri Selangor. (2013). Mesyuarat Ketiga Penggal Pertama Dewan Negeri Selangor Tahun 2013: 85) Cuti Bergaji Sebulan Kepada Wanita Kematian Suami. Portal Rasmi: Dewan Negeri Selangor. <http://dewan.selangor.gov.my/question/cuti-bergaji-sebulan-kepada-wanita-kematian-suami/>
- Ghazali Darusalam dan Sufean Hussin. 2016. *Metodologi Penyelidikan dalam Pendidikan*. Kuala Lumpur: Penerbit Universiti Malaya.
- Kamal Azmi Abd. Rahman et al. 2015. *Kaedah Penyelidikan: Asas-Asas Penyelidikan Islam*. Kolej Universiti Islam Antarabangsa Selangor (KUIS)
- Syh Noorul Madihah, S. H. (2009). Kefahaman tentang Ihdad di Kalangan Wanita Muslim Bandar Dungun. *Jurnal Islam Dan Masyarakat Kontemporari*. 103–126.
- Syh Noorul Madihah, S. H., & Raihanah, A. (2010). Pendekatan Islam dalam memelihara masalah wanita selepas kematian suami. *Jurnal Syariah*, 18(3), 479–506. Retrieved from http://api.um.edu.my/journals/journal_syariah/About_Syariah.php
- Temubual bersama Informan 1 pada 7 Julai 2022 di Starbuck Bangi Avenue, jam 5 petang
- Temubual bersama Informan 2 pada 14 Julai 2022 di Starbuck Bangi Avenue, jam 5 petang
- Temubual bersama Informan 3 pada 15 Julai 2022 di Richiamo Bandar Seri Putra, jam 11.00 pagi
- Temubual bersama Informan 4 pada 4 Ogos 2022 secara atas talian aplikasi Google Meet, jam 11 pagi
- Temubual bersama Informan 5 pada 10 Ogos 2022 di Saha Coffee Bandar Seri Putra, jam 12.00 tengahari
- Wahbah Al-Zuhaili.1989. *Fiqh Islami wa Adillatahu*. Dar al-Fikr: Damsyik